

# In infect artistic

Sandra Palaia da Glion ha lantschau il project «CH-Bodypainting-Virus»

CARMEN MONN/FMR



Il motiv actual ein ils animals all'arca da Noah.

FOTOS MAD

■ Il project nua che las participontas dessegnan maletgs sin lur agen tgiarp duei esser ina pusseivladad per schar reviver il plascher vid la lavur. Dapi in onn san era las artistas ed ils artists buca luvrar sco giavischau. Sandra Palaia (45) ha anflau 22 dunnas dalla Svizra, Tiaratudestga e dils Stadis Uni dall'America che separticipeschan al project communabel. All'entschatta digl onn 2021 han fotografias da demunis fatg la curella ellas medias socialas. «Gl'impuls pil project ha l'artista Christine Hüttler dau», di Sandra Palaia. Ella ed in'otra collega han viu la fotografia da Hüttler e silsunter malegiau il demuni sin lur agnas fatschas. L'idea pil project «CH-Bodypainting-Virus» seigi semadirada entras brattar ora maletgs. Il secund sujet artistic che la dunna da Glion ha elegiu pil project porta il num «Tinyfaces/Noseladies» e l'idea ei stada da malegiar ina fatscha da miniatura sin l'atgna fatscha. Adina dapli dunnas ein separticipadas ed aschia ha ella fundau ina gruppa per quei project d'art. Il num «CH-Bodypainting-Virus» ha ella elegiu per quei che las participontas (entochen uss eis ei sulettamein dunnas) dueien schar s'infectar dil virus artistic.

## Arca da Noah

Il mument ein las artistas dalla Svizra, Tiaratudestga e dils Stadis Uni dall'America vid crear maletgs d'animals per l'arca da Noah. «Entginas dunnas han schizun malegiau tschun differents animals», di Sandra Palaia ch'ei oriunda da Lucerna e che habitescha dapi gleiti 20 onns a Glion. Il motiv principal seigi il plascher vid la lavur, da saver exercitar denton era da puspei inaga saver prender las colurs ord il tschaler. «Nies material ha numnadamain era in termin da scadenza», menziuna la dunna ch'ei artista diplomada da «Face- e Bodypainting». Mintgina hagi duas entochen treis jamnas peda per designar il maletg. Silsunter aschunta ella tut las fotografias ad ina collascha e metta quella ellas medias socialas.



Sandra Palaia ei la fundatura dil project artistic.

## Negin project commercial

Sandra Palaia ei artista sur seseza e posseda igl atelier «stellArte» a Glion. Ella sminchescha affons ad occurrenzas grondas e fa «Belly-Painting»; quei munta ch'ella ornescha il venter da dunnas ch'ei en speranza. Dasperas malegia ella sujets dalla natira, da carstgauns ed art abstract. Dapi gleiti in onn sa ella denton buca luvrar sco giavischau. La stad vargada havessi ella giu entginas incaricas. Quellas seigien denton vegnidas spustadas ni strihadas pervia dil coronavirus. «Igl art ei mia suletta fontauna d'entradas ed jeu hai il cleg che miu um ha

in'entrada garantida.» Semegliont vesa ei ora tier la maioritad dallas participontas dil «CH-Bodypainting-Virus». Ellas seigien mummas e dunnas da casa ni hagian aunc in'otra lavur. Incassar daners entras quei project lessi Sandra Palaia denton buca. «L'intenziun ei veramein da buca piarder la motivaziun e da surmuntar il temps entochen che nus astgein puspei luvrar regularmeim.»

Tgi che vul veser ils resultats dil project «CH-Bodypainting-Virus» sa far quei silla pagina d'Instagram stellarte7 ni visitar la pagina d'internet [www.stellarte.ch](http://www.stellarte.ch)

## Suten ferdaglia e tschaghera – suren fina bialaura e temperaturas emperneivlas

(fmr/hh) La fin d'jamna ei stada magnifica cun in'excepziun: La sonda ei la tschaghera stada zaia ed ei serasada entochen sin biebein 2000 meters sur mar. Tgi che ha pudiu pli ad ault ha gudiu in tschiel blau senza neblas. La foto muossa ils umens-crap dil Péz Ault (2471 m s.m.) ella Val Medel cun vesta viers la cadeina da cuolms senierster dil Rein. Senierster sur igl um-crap grond ves'ins il Péz Tgietschen.



FOTO HANS HUONDER